



Inatsisartut sulerasianni § 36 naapertorlugu apequteqaat aallaavigalugu oqallisissiaq imaattoq matumuuna saqqummiuppara:

Qanoq ililluta nunatsinni aalisarnermi aqumiunik inuttanillu teknikimik suliaqartunik atorfinitsisinermi kalaallinik annertunerusumik atuinissarput pillugu apequteqaat aallaavigalugu oqallinnissamik siunnersuut.

(Inatsisartunut ilaasortaq Peter Olsen, Inuit Ataqatigiit)

Tunngavilersuut:

Sermitsiaq AG-ip nittartagaani ulloq 13.december ilaatigut ima allasimasoqarpoq:

“Kalaallit Nunaanni inuit ikippallaarpugut. Nunasiortorneq allamiullu amerlanerit inuiaqatigiinnut tapertaasinnaasut pisariaqartippavut. Royal Greenlandip pisortaaneranit, Mikael Thinghuus-imit oqariartuut taama nipeqarpoq.

Taassuma tikkuarpaa, Royal Greenlandimut kilisaatini aqumiunik Savalimmiormiunik atuisinnaaneq pingaartuusoq, kalaallinik ilinniarsimasunik amigaateqarmat”

1979-mi namminersornerulerpugut aammalu 2009-mi namminersulerluta siunertaralutigu nunatsinni immitsinnut aqunnerulerumalluta, akisussaaffeqarnerulerumallutalu. Nunatsinni ukiuni siuliini, sutigut tamatigut ineriartornerup iluani isiginnaartuuginnarsimanitta – akisussaaffijagaasimanittalu kingunerisimasai suujunnaarsikkumallutigit. Akisussaaffik nammineq tigusukkatsigu, immitsinnullu aqunnerulerumalluta.

Ajoraluartumik ullumikkut uunga kiisa killippugut siunertarput anguniagarpullu suliluunniit iluamik qanillattorpiarsimanatigu. Tamanna uggornarpoq ajuusaarnarlunilu.

Tamatuma takutiinnarpaa, suli sutigut tamatigut sukataarnerullutalu ilungersornerusariaqartugut anguniagarput siunertarpullu qanillattorsinnaajumallutigu.

Piffissami kingullermi sivitsulersumi ajoraluartumik nunaqqatitta akornannit, imarsiornermik suliaqartut, suliaqarusukkaluartullu akornannit nipi imaattoq tusarsaajualersimavoq;

“Imarsiornermut Ilinniarfimmiit allagartaqarpunga, qinnuteqaraluarama tigujumaneqanggila-nga, misilittagakippallaarpungagooq. Savalimmiormiut ilinniartikkutsigit ilinniartikkutsigit aasi-illi qulaatiinnarluta aqutsisunngortaraat naalaganngortaraallu. Savalimmiormiut allaffimmi naalagaapput kammalaatiminnik atorfinitsisartuupput. Nuummi adressilersorput uffa Savalimmiuni najugaqarlutik. Igaffimmiunut, tunisassiorfimmilu pisortanut allaat aqutsisun-

ngortarput uffa uagut tamakku nammineq sapinngikkivut. Savalimmiormiut kisimik bonusord-ningeqarput, uagulluunniit bonusisinneqarneq ajorpugut”

Oqaatsit qulaani anninneqartut tassaapput uagutsinnut politikeriusunut piffissami kingullermi anngussuunneqartalersimasut. Ilumoornerisut ilumuunnginnersulluunniit uani uanga isummer-sorfigissanngilara.

Pingaarnerpaaq uaniissoraara ajornartorsiutit qulaani taakkartorneqartut pillugit inatsisartuni ammasumik oqallittoqarnissaa, taamattoqarsimappallu pitsanngorsaataasinnaasunik aaq-qiissutaasinnaasunillu ujartueqatigiinnissaq.

Partiit tamarmik, naalakkersuisullu qanormita oqaasissaqarpat qulaani ajornartorsiutit taakkar-orneqartut pillugit? Ajornartorsiutimmita qanoq ilillugit qaangerniarneqarsinnaappat?

Imarsiornermi ilinniarsimasut RG-mi atorluarneqarnerulernissaat siunertaralugu Naalakkersuisummita qanoq pilersaaruteqarpat?

Royal Greenlandip kilisaataani aquttut, naalakkat, maskinmesterillu amerlanerpaartaasa kalaaliunissaat anguniarlugu Naalakkersuit qanormita pilersaaruteqarpat? Qanoq iliuuseqarniarpat?

Imarsiornermi ilinniakkat salliuunneqarnerulernissaat pillugu Naalakkersuisut qanormita iliuuseqarniarpat?

Ingerlatseqatigiiffiup sulisoqarnikkut suut piumasaqataappat aamma ingerlatseqatigiiffiup piumasaqaatai kalaalalinit naammassineqarsinnaanissaat anguniarlugu Naalakkersuisut qanoq pilersaaruteqarpat?

Tamanna pillugu apeqquteqaat aallaavigalugu oqallisissiorpunga qulakkeerniarlugu, nunatsinni kilisaatini inuttat nunaqavissut atorluarnerulersinnaanissaat anguniarlugu.

Uummarissumik angusaqarfiulluartumillu oqallittoqarluarnissaannik kissaassillunga

Qujanaq

Peter Olsen
Inuit Ataqatigiit